

T 3159/5932.83

4



正府新志卷之五

歷代表

周

宣王元年今大夫秦仲往西戎而戎殺秦仲

六年秦仲子莊公伐西戎破之於是復秦仲後及襄

先大隆大邱地

幽王十年山陰八國及諸諸供八從禮之戎

公

周王十四年秦仲伐西戎



直隸秦州新志卷之五下

歷代戎事附

周

宣王元年命大夫秦仲征西戎西戎殺秦仲

六年遣仲子莊公伐西戎破之於是復秦仲後及其  
先大駱大邱地

幽王十年由餘八國及綿諸緄戎翟獯之戎歸秦襄  
公

桓王十四年秦武公伐邽戎取其人來置邽縣

哈佛大學漢和  
圖書館珍藏印



安王十八年秦獻公初立欲復穆公之迹兵臨涇首  
滅狄獯戎

漢

高帝二年諸將略地拔隴西騎都尉靳歙等擊章平  
軍於隴西破之定隴西六縣周勃攻上邽取之

高后六年夏匈奴寇阿陽

阿陽屬天水

文帝十四年冬匈奴入邊遣周舍等三將軍軍隴西  
北地上郡

武帝元朔二年衛青出雲中以西至隴西擊胡之樓

煩白羊王

元狩二年春三月驃騎將軍霍去病將兵出隴西擊  
匈奴其夏驃騎復與合騎侯數萬騎出隴西

元鼎五年秋西羌反

六年冬發隴西天水騎士遣將軍李息郎中令徐自  
爲征西羌平之

宣帝神爵元年春三月先零羌楊玉叛夏四月遣後  
將軍趙充國擊之秋七月充國擊叛羌叛羌多降

元帝永光二年秋七月隴西羌多姐旁種反詔右將



軍馮奉世將兵擊之八月遣奮武將軍任千秋領五校與右將軍並進大破之

王莽時遣寧始將軍廉丹大發天水隴西騎士擊西南夷

更始元年秋成紀隗崔隗義上邽楊廣冀周宗推崔

兄子囂起兵應漢攻平襄殺莽大尹李育

平襄縣在伏羌縣西

北稱囂為上將軍囂立高廟於邑東

平襄之東門

東漢

光武建武元年冬十二月囂歸自長安復據天水自

稱西州上將軍鄧禹承制命囂為大將軍得專制涼州

二年春正月延岑反李寶破岑岑走天水入散關八

月赤眉引兵欲西上隴隗囂遣楊廣逆擊破之

六年夏四月遣耿弇蓋延等七將軍從隴道伐蜀五

月隗囂反使王元據隴坻諸將因與囂戰大敗各引

兵下隴囂追之馬武殿拒殺數千人諸將乃還冬十

二月囂乘勝遣王元行巡將兵下隴馮異祭遵擊破

之



七年秋隗囂將金梁守畧陽漢兵不得進

八年春來歙將兵徑回中襲略陽斬囂將金梁據其

城囂使王元拒隴坻牛邯據瓦亭自率兵圍略陽夏

閏四月漢遣竇融帥五郡太守及羌虜小月氏等擊

囂進軍上隴以書招牛邯下之囂衆悉降囂奔西城

從其將楊廣

西城者西縣城也在今秦州上邽縣西南隅或以西城爲縣名誤

田弇

李育保上邽畧陽圍解五月漢帝勞賜來歙進幸上

邽誅囂子恂使吳漢岑彭圍西城耿弇蓋延圍上邽

秋九月楊廣死冬十月岑彭壅谷水灌西城王元行

巡將蜀兵卒至漢軍大驚元等決圍殊死戰遂得入

城迎囂歸冀漢兵退天水隴西復反爲囂

九年春正月隗囂率王元等立囂子純爲王據冀城

公孫述遣將助純使王元與領軍環安拒河池漢帝

遣馮異擊之遣蓋延西擊街泉畧陽清水諸屯聚皆

定之秋八月詔來歙帥馮異等五將軍討純於天水

十年春正月馮異破公孫述將趙匡於天水斬之冬

十月來歙等攻破落門隗純降王元奔蜀先零羌與

諸種寇隴西來歙帥蓋延等進擊大破之斬首虜數



正統秦州新志 卷之五 四  
千人隴右悉平

十一年夏四月先零諸羌寇隴右六月公孫述使王元據河池來歙蓋延擊破之述使盜刺殺來歙用馬成代之冬十月馬成等破河池復因隴西太守馬援擊破先零羌徙降羌置天水隴西

二十年夏五月匈奴寇天水下隴坂遂至扶風冬十二月復寇天水

中元二年夏四月燒當羌滇吾滇岸寇隴西天水兵敗於白石死者千餘人冬十一月遣中郎將竇固捕

虜將軍馬武討破之

明帝永平十五年冬駙馬都尉耿秉奉車都尉竇固將兵屯涼州議擊匈奴

十六年春二月遣耿秉竇固等帥隴西天水募士及羌胡萬騎出張掖伐匈奴

章帝建初二年夏六月燒當羌叛金城太守郝崇討之敗績羌遂寇漢陽秋八月遣行車騎將軍馬防等擊之

三年春馬防耿恭擊羌破之



元和三年秋九月燒當羌號吾寇隴西迷吾同反號吾先入

督烽掾李章追之生得號吾將致諸郡號吾曰獨殺

我無損於羌誠得生歸必悉罷兵不復犯塞隴西太

守張紆放遣之羌即為解散各歸故地迷吾退居河

北

章和元年春以隴西太守張紆為校尉屯臨羌秋紆

擊羌斬其帥迷吾其子迷唐據大小榆谷以叛

二年冬十月以鄧訓為護羌校擊迷唐次年春破之

和帝永元二年秋七月遣冠軍侯竇憲屯涼州

五年冬十月護羌校尉貫友攻迷唐於大小榆谷走之

九年秋閏八月燒當羌迷唐寇隴西脅塞內諸羌殺

大夏長大夏縣屬隴西郡遣行征西將軍劉尚越騎校尉趙

世等擊破之

十三年秋八月護羌校尉周鮪等擊迷唐種人悉降

分徙漢陽隴西迷唐遠踰發羌居羌別種

安帝永初元年夏六月騎都尉王宏發隴西漢陽諸

降羌西迎段禧諸羌復叛懼遠斷隴道詔赦其罪冬



十二月詔車騎將軍鄧騭征西校尉任尚屯漢陽以備羌

二年春正月鄧騭至漢陽諸羌擊敗騭軍於冀西冬

鄧騭使任尚等與滇零等戰於平襄屬漢陽郡尚敗績冬

十一月詔鄧騭還留任尚屯漢陽節度諸軍

五年秋九月漢陽人杜琦全弟季貢同郡王信等與

羌通謀寇陷上邽十二月漢陽太守趙博遣刺客殺

杜琦

六年夏六月遣侍御史唐喜討王信破斬之滇零昌

復以杜季貢為將軍

元初元年夏六月羌豪號多掠漢中斷隴道校尉侯

霸與戰破之

二年春護羌校尉龐參以恩信招諸羌號多等帥衆

降秋九月龐參與左馮翊司馬鈞擊零昌參至勇士

東為杜季貢所敗引退

四年春二月護羌校尉任尚遣羌殺杜季貢秋九月

任尚募種羌號封刺殺零昌十二月任尚與騎都尉

馬賢擊羌狼莫大破之西河種羌降隴西平



五年冬十月度遼將軍鄧遵募羌殺狼莫

建光元年秋八月燒當羌麻奴入寇護羌都尉馬賢

擊破之

延光元年十一月燒當羌麻奴詣漢陽太守耿种降

順帝永建元年二月隴西種羌反護羌校尉馬賢擊

破之

陽嘉三年秋七月種羌良封等寇隴西漢陽拜馬賢

為謁者鎮撫諸羌冬十月護羌校尉馬續擊良封破

之

四年春二月謁者馬賢擊種羌大破之殺良封

永和四年九月且凍羌寇武都燒隴關即大震關今清水盤龍鋪

五年夏五月且凍羌內寇以馬賢為征西將軍屯漢

陽

六年春正月馬賢與羌戰敗績死之羌復寇隴西三

月趙种討破之

漢安元年冬罕羌降

二年夏四月護羌校尉趙冲及漢陽太守張貢擊燒

當羌於參蠻破之冬閏十月趙冲擊燒當羌於阿陽



破之

建康元年春領護羌校尉衛琚追擊從事馬元斬之

元為諸羌誘出塞隨諸羌亡趙冲追叛羌遇伏與戰死之

冲帝永嘉元年春二月左馮翊梁並以息信招叛羌

降之隴右復平

桓帝延熹二年冬十二月燒當等八種羌叛寇隴右

護羌校尉段熲擊破之

四年冬十月先零沈氏羌寇涼州

五年春三月皇甫規討隴右東羌遣使乞降涼州復

通

初規發先零諸種羌共討隴西而道路隔絕軍士疫死者十三四規親為撫視三軍感悅秋七

月烏吾羌寇漢陽隴西諸郡兵討破之

六年隴西太守孫羌擊滇那羌破之冬十二月復以

段熲為護羌校尉

七年冬十月段熲擊當煎羌破之

八年閏五月段熲擊西羌大破之斬首二萬三千級

獲生口數萬人降者萬餘封熲都鄉侯

九年秋七月鮮卑誘諸羌復反

靈帝建寧元年破羌將軍段熲連破羌寇餘羌悉散



入漢陽山谷

二年夏五月遣謁者馮禪說降漢陽散羌段熲復遣司馬田晏等擊破之羌潰復聚熲與司馬張熿等奮擊大破之斬萬餘級降四千餘人分置漢陽隴西中平元年北地羌胡與邊章等寇亂隴右刺史左昌使漢陽長史蓋勲別屯阿陽以拒賊鋒邊章進圍昌於冀勲復帥兵救之賊解圍去

二年車騎將軍張溫出征涼州賊邊章等又使破虜將軍董卓將兵三萬討先零羌卓於望垣北

望垣縣屬天水

郡為羌胡所圍以計全師而還

四年春三月韓遂圍隴西太守李襄如叛與連和涼州刺史耿鄙戰死賊進圍漢陽胡騎數千隨之漢陽太守傅燮死之漢陽人王國與扶風馬騰并叛六年春二月皇甫嵩擊國破之

獻帝建安十一年秋七月武威太守張猛殺涼州刺史鄆鄆商

十八年秋七月馬超帥羌胡擊隴上諸郡縣郡縣皆應之冀城固守

冀城屬漢陽郡及涼州刺史治焉

超兼衆攻冀城自



正月至八月別駕閆溫死之外救不至刺史常康與太守開門納超超殺刺史太守涼州參軍楊阜與趙昂李俊謀討超時阜外兄天水姜叙為撫夸將軍擁兵屯歷城歷城在縣西安定梁寬南安趙衢內應秋九月阜與撫夸將軍姜叙進兵入鹵城在西縣冀城之間昂奉據祁山以討超水經注祁山在嚮譎誘超出擊與寬因閉冀城殺超妻子超進退失據乃襲歷城姜叙母楊氏死之楊阜與超戰超敗績奔張魯

九年春馬超益兵還圍祁山與國氏王阿貴白項

氏王千萬各帥部落萬餘從之夏侯淵張郃救祁山超敗走淵襲韓遂於顯親因擊長離羌羌在遂軍者歸救長離淵擊遂大破之進圍興國滅之白項氏王奔蜀其部不能去皆降曹操徙其善者分留天水南安界

二十年夏四月曹操征張魯至河池氏王竇茂恃險不服五月攻屠之既克漢中李特祖將五百餘家歸之操拜為將軍遷於畧陽後漢



後帝建興六年丞相亮攻祁山天水南安安定皆應  
 漢天水參軍姜維詣亮降亮使馬謖與魏將張郃戰  
 於街亭續漢志漢陽畧陽縣有街泉亭前漢之街泉縣也杜佑曰街泉亭在隴縣謖敗績  
 亮拔西縣民還漢中冬十二月亮引兵出散關糧盡  
 退魏將王雙追亮亮擊斬之

九年春二月丞相亮伐魏圍祁山以木牛運魏司馬  
 懿留兵守上邽帥衆救祁山亮逆懿於上邽郭淮等  
 邀亮亮破之過懿於上邽懿依險兵不得交亮引還  
 懿遣張郃追亮於木門郃中流矢死木門去天水軍天水縣十里

十四年夏四月氐苻健降於漢

延熙十年衛將軍姜維出隴西

十三年姜維復出西平不克而還

十七年夏六月魏狄道長李簡密書請降姜維復率  
 衆出隴西應之

十八年夏姜維復伐魏大破雍州刺史王經於洮西  
 經退保狄道維圍之魏征西將軍陳泰軍上邽進兵  
 解圍維却住鍾題

十九年秋七月姜維復帥衆出祁山與鎮西將軍胡



濟期會上邽濟失誓不至維與魏鄧艾爭險不克夜

趣上邽艾與戰段谷

水經注上邽之南

維敗績

晉

武帝泰始六年夏六月秦州刺史胡烈討鮮卑禿髮

樹機能敗績死之

咸寧三年春三月遣平虜護軍文鴛督秦涼諸軍討

樹機能破之

惠帝元康六年秋八月秦雍氐羌悉叛推氏帥齊萬

年僭號稱帝冬十月曲赦雍涼二州十一月遣安西

將軍夏侯俊建威將軍周處等討之十二月畧陽氐

楊茂搜據仇池

太安二年秋秦州刺史皇甫重發隴上兵攻河間王

顓顓遣金城太守游楷隴西太守韓稚等攻重

永興二年夏四月游楷等攻皇甫重不能克城中人

殺重以降顓以馮翊太守張輔為秦州刺史輔殺天

水太守封尚又召隴右太守韓稚稚子朴擊輔輔敗

死

懷帝永嘉四年秋漢主聰遣使拜畧陽臨渭蒲洪為



平遠將軍不受自稱秦州刺史畧陽公

五年夏四月南陽王模表其世子保鎮上邽秦州刺

史裴苞拒之模使都尉陳安攻苞苞奔安定秋七月

漢劉曜寇長安殺南陽王據長安王世子保保於上

邽自稱大司馬承制隴右氏羌皆降之

六年秋九月涼張寶遣兵擊秦州刺史裴苞破之苞

奔柔肉塢

愍帝建興三年春三月都尉陳安歸世子保於秦州

保命安討叛羌保將張春伏刺安安馳還隴城

五年氏楊堅頭屯河池號右賢王

東晉

元帝建武元年春氏羌掠隴右民死者十八九

太興二年夏四月南陽王保自稱晉王改元建康上邽大

饑張春奉保之祁山陳安自稱秦州刺史應保已而

稱藩於劉曜春復奉保奔桑城已陳安退保綿諸保

歸上邽屠各路松多附之秦隴氏羌應之是年苻洪降趙

三年春正月劉曜攻路松多於草壁陷之路松多奔

隴城保為劉曜所逼遷於桑城夏五月張春楊次殺



晉王保陳安討殺之

永昌元年春二月趙主曜擊楊難故遷隴西萬餘戶於長安難故降曜以難故為假黃鉞武都王會曜疾歸秦州刺史陳安叛曜掠其輜重而還遣弟集追曜曜將呼延瑜逆擊殺集安乃還上邽隴上氏羌皆附安安自稱大都督假黃鉞涼王休屠王石武以桑城降趙趙以武為秦州刺史冬十二月涼張茂使將軍韓璞取隴西南安之地置秦州

南陽王保既死陳安不能取之

明帝大寧元年夏六月陳安圍趙征西將軍劉貢於

南安曜秦州刺史石武將攻上邽安懼趣歸武貢合擊安大破之安走保隴城留將宋亭守上邽秋七月趙主曜自將圍隴城遣兵圍上邽安出戰輒敗右軍將軍劉幹攻平襄克之隴上諸縣悉降趙安留其將楊伯支等守隴城帥精騎突圍奔陝中曜遣將呼延清追之獲安於澗曲殺之楊伯支以隴城別將宋亭以上邽皆降曜徙秦州大姓楊姜諸族二千餘戶於長安氏羌皆降曜曜以羌酋姚弋仲為平西將軍平襄公曜自隴上西擊涼州自將戎卒營河上張茂遣



使降

成帝咸和二年夏涼張駿去曜官號復稱晉大將軍  
遣將攻掠趙秦州諸郡曜遣將擊敗之復遣將發氏  
羌之衆屯於秦州

三年後趙石勒將石虎攻氏帥蒲洪於隴山降之

四年春正月趙太子熙南陽王胤奔上邽

熙聞趙主曜被擒大

懼與胤謀西保秦州尚書胡勳諫胤怒斬之遂西奔秋八月趙南陽王胤自上

邽趣長安後趙公虎大破趙兵胤奔還上邽虎追擊

之上邽潰執太子熙及胤殺之及其將王公卿牧以

下三千餘人徙其臺省文武閑東流民秦雍大族九

千餘人於襄國秦隴悉歸後趙氏蒲洪羌姚弋仲俱

降於虎

七年秦州休屠王羌叛於石勒刺史臨深遣司馬管

光帥州軍討之爲羌所敗隴右大擾氏羌悉叛勒遣

石生據隴城王羌兄子擢與羌有仇生乃賂擢與擢

擊之羌敗奔涼州徙秦州夸豪五千餘戶於雍州

八年後趙石宏將石生自稱秦州刺史稱藩於晉冬

十月生遣將軍郭權拒趙挺破之鮮卑潛與石虎通



謀反擊生遂匿於鷄頭山上祿關東權奔隴右虎滅生

復遣將討蒲洪以洪西附張駿也降之十二月郭權據上邽

遣使降涼新平北地皆應之

九年春三月趙丞相虎遣將擊郭權夏四月上邽豪

族殺權降虎虎徙秦州三萬餘戶於青并州

穆帝永和六年冬十一月趙涼州刺史石寧據上邽

不下十二月秦苻雄擊殺之秦雍夏夸皆降秦苻健

八年秋七月趙故西中郎將王擢請降遣使拜擢秦

州刺史冬十月秦丞相苻雄攻王擢於隴西擢奔涼

涼張重華以擢為征虜將軍秦州刺史

九年春二月張重華遣將會王擢伐秦敗績擢奔姑

臧秦以領軍將軍苻願為秦州刺史鎮上邽秦州郡

縣多應之夏五月重華復攻上邽拔之使王擢襲秦

州取之

十年夏六月司馬勲掠秦西郡涼秦州刺史王擢應

之秦丞相雄擊勲勲奔還漢中冬十月涼遣秦州牛

霸擊擢擢降秦秦以擢為尚書以啖鐵為秦州刺史

仇池公



升平三年春二月秦平羌護軍高離據略陽叛秦州刺史啖鐵等討平之

帝奕太和元年冬十月羌歛岐以畧陽四千家歸李儼

二年春正月秦輔國將軍王猛揚武將軍姚萇等討

歛岐三月涼張天錫遣將討儼岐岐部落聞姚萇至

皆降萇

部秦先屬弋仲者

猛遂克畧陽岐奔白馬夏四月邵

羌擒歛岐於白馬遂猛與天錫相待於城下邵既

擒岐猛遣天錫書曰吾受詔救儼不令與涼州戰天

錫謂諸將曰吾本來伐叛不來戰秦遂歸時李儼猶

憑城未出王猛白服乘輿從者數十人請與相見儼

開門延之遂執儼冬十月秦秦州刺史苻雙據上邽

及苻武據安定應之秦遣使諭之不從遣兵討之

三年春正月秦王堅遣楊成世討上邽二月楊成世

與雙將苟興戰成世敗績秦復遣武衛將軍王監寧

朔將軍呂光等討之夏四月雙至榆眉呂光擊破之

雙武奔上邽秋七月王監等拔上邽斬雙武秦以左

衛將軍苻雄為秦州刺史



簡文帝咸安元年春二月秦以秦州刺史侯雅為都

督秦州牧

雅西縣人

三月秦秦州牧侯雅及姚萇等帥師

伐仇池與楊纂戰於鷲峽

在仇池縣北

纂敗績冬十二月

徙涼州治金城

自天水徙治金城

秦王統攻隴西鮮卑乞伏

司繁司繁拒統於苑川統襲司繁司繁部落皆降司

繁亦降

苑川水經注在天水勇士縣界

孝武寧康元年冬鮮卑勃寒掠隴右秦使乞伏司繁

討之勃寒降秦以司繁鎮勇士川

即漢天水勇士縣地

太元六年秋九月秦以左禁將軍楊璧為秦州刺史

使驍騎將軍呂光為使持節都督西域征討諸軍事

伐西域冬十二月乞伏步顏據隴西叛秦秦遣乞伏

國仁討之國仁遂與之合

九年姚萇懼苻堅誅之奔渭北西州豪族尹詳等推

萇為盟主萇將拒之天水尹緯說萇萇乃自稱秦王

十年秋九月乞伏國仁自稱秦州大都督大將軍秦

河二州牧改元建義置安固漢陽天水畧陽甘松白

馬苑川等十二郡築勇士城都之冬十一月秦主丕

會秦州刺史王統等擊後秦時苻堅死堅衛將軍楊



定將家奔隴右尋徙治歷城置倉儲於百頃自稱龍驤將軍仇池公遣使稱藩詔假之後又取天水畧陽之地自稱秦州刺史隴西王

十一年秋八月後秦姚碩德自隴上自稱征西將軍以應兄萇以兄孫詳為安遠將軍據隴城從孫訓為安西將軍據赤亭與秦秦州刺史王統相持萇會碩德攻統天水屠畧陽羌胡應之秦畧陽太守王皮降之九月秦王統以秦州降於後秦後秦以姚碩德為使持節都督隴右諸軍事秦州刺史鎮上邽又十

月後秦主萇自上邽還安定秦南安王登進攻姚碩

德於秦州後秦主萇救之登與萇戰於胡奴阜上邽西

大破之將軍啖青射中萇萇走保上邽姚碩德代之統衆

十四年秋九月後秦主萇使姚碩德置秦州守宰以從弟常成隴城邢奴戍冀城姚詳戍畧陽楊定攻隴

冀克之斬常執邢奴詳棄畧陽奔陰密定自稱秦州

牧定後為西秦乞伏所殺天水姜乳復襲據上邽

十七年冬十二月休官權小城據顯親自稱秦州牧

十八年苻登與姚萇將姚崇爭麥於清水累為崇所



敗

十九年秋七月後秦主興討叛將強熙熙奔秦州冬十月西秦王乾歸逐秦主苻崇崇出奔乾歸盡有隴西地

二十年夏四月西秦王乾歸遣乞伏益州討姜乳至

大寒嶺

直上邽西

二十一年冬十一月鮮卑越質詰歸叛西秦降於後

秦秦處之成紀拜鎮西將軍平襄公後秦隴西王碩

德攻姜乳于上邽乳降秦以碩德鎮上邽強熙及畧

陽豪族權于成帥兵圍上邽碩德擊破之熙奔仇池

碩德西擊于成於畧陽于成降

安帝隆安元年春正月涼王呂光遣將竇苟伐乞伏

乾歸戰於街亭涼兵敗績

四年夏五月後秦隴西公碩德伐西秦西秦王乾歸

拒之秋七月乾歸遣將斷秦樵采秦王興自救之乾

歸使慕容元屯伯陽

伯陽天水郡縣名後更名秦嶺

比與秦戰敗績走

歸苑川

元興元年春二月魏人襲沒奕于于棄其部衆率數



千騎與赫連勃勃奔於秦州魏軍次進瓦亭夏五月  
後秦以沒奕干權鎮上邽

義熙元年冬十一月西秦乞伏乾歸伐仇池仇池公  
楊盛大破之

二年夏六月秦姚碩德自上邽朝長安旋歸上邽赫  
連勃勃殺高平公沒奕干收其衆以叛姚興

三年乞伏乾歸遣其子熾磐討論薄地延降之徙其  
部落於苑川

六年春二月夏勃勃寇隴右攻白崖堡破之遂趨清

水後秦畧陽太守姚壽都棄城奔秦州勃勃徙其民  
萬六千戶於大城秦王興先自安定追之不及而還  
西秦王攻秦畧陽克之徙其民於苑川

七年春正月後秦使太尉索稜招撫隴右乞伏乾歸  
謝罪請降秦拜乾歸河南王秋八月乾歸攻秦畧陽  
太守姚龍於栢陽克之栢陽卽白陽又征西羌彭利髮利  
髮棄衆南奔遣將追及清水斬之

八年春仇池楊盛擾祁山姚興遣秦州刺史姚嵩等  
分道伐之自將輕騎與諸將會於隴口諸將爲盛所



敗興乃還

九年春三月西秦王乞伏熾盤遣將擊顯親休官權小城等於隴西斬之隴右休官悉降後秦太尉索稜以隴西降西秦

十一年春三月後秦王興命廣平公弼將三萬人鎮秦州秋七月西秦以秦州刺史曇達爲尚書令王招爲光祿勳爲秦州刺史冬十一月西秦以王孟保爲畧陽太守鎮赤水

十二年夏四月西秦襄武侯曇達等擊後秦秦州刺史姚艾於上邽破之徙其民五千餘戶於抱罕六月氐王楊盛攻秦祁山拔之進逼秦州秦後將軍姚平守將姚嵩救祁山盛引兵退平與嵩追之及於竹嶺姚讚率隴西太守姚秦都畧陽太守王煥以禁兵赴之讚至清水嵩已敗嵩及秦都王煥皆戰死夏赫連勃勃聞姚嵩與楊盛相持率騎四萬襲上邽盛已破嵩勃勃攻上邽二旬克之殺泓秦州刺史姚平都及將士五千人毀城而去冬十一月西秦王熾磐使秦州刺史王松壽鎮馬頭以逼上邽



十三年冬十月西秦擊後秦將姚艾艾稱藩西秦以艾爲征東大將軍秦州牧徵王松壽爲尚書右僕射宋

高祖永初二年春正月西秦王熾磐遣將攻上邦夏平原公赫連定奔上邦

文帝元嘉三年秋西秦攻涼夏襲秦苑川秦師還

四年六月魏破赫連昌昌將麾下數百騎西南走奔上邦昌弟平原公定拒司空奚斤於長安城娥青率騎五千討之亦西走上邦

五年春二月秦雍氏羌皆叛赫連昌魏將尉春攻昌於上邦執以歸

七年冬十月夏赫連定遣帝代攻西秦於南安西秦王乞伏慕末請降於魏魏許之乃帥五千如上邦十一月魏將古弼擊夏赫連定定中削單騎走保上邦定從兄東平公乙升棄安定奔長安畧數千家西奔上邦

八年夏夏滅西秦以秦王慕末歸殺之

九年夏六月赫連定西遷氏王楊難當據上邦以其



子順爲秦州刺史守上邽

十年秋九月魏遣史持節拜難當爲征南大將軍秦

涼二州牧南秦王難當奉表謝罪於宋詔赦之

十二年魏遣楊保宗襲上邽難當子順失守

十三年春三月難當自稱大秦王改元建義置百官

秋七月魏遣樂平王丕尚書令劉潔討難當

以前據上邽也

九月丕等至畧陽難當懼請攝上邽守兵還仇池

十六年春三月楊保宗歸魏魏以保宗爲都督隴西

諸軍事征西大將軍秦州牧鎮上邽妻以公主冬十

二月楊難當攻魏上邽

十九年夏楊難當叛宋宋詔龍驤將軍裴方明討破

之難當奔上邽獲其子保熾秋七月魏詔將軍建興

公古弼督隴右諸軍及殿中虎賁與武都王楊保宗

等從祁山南入邀宋將裴方明歸路

二十年十一月宋將軍姜道盛與楊文德合衆攻魏

濁水戍魏戍豹子等救之道盛敗死

二十二年夏四月魏主遣秦州刺史封敕文擊吐谷

渾什歸於抱罕八月封敕文入抱罕徙其民千家還



上邽

二十三年春二月魏金城邊固天水梁會據上邽東城反攻逼西城刺史封敕文却之氏羌萬餘人休官屠各萬餘人皆應固會敕文擊固斬之會棄東城走敕文乃告會衆降者赦之會衆潰分兵追討悉平之略陽王元達因梁會之亂聚衆屯松多川敕文討平之

水經注松多川在隴山西南流逕隴縣南注秦水

二十九年魏隴西屠各叛討平之

孝武帝大明二年十月將軍殷孝祖修兩城於清水

東魏鎮西將軍封敕文等來爭

元魏自宋孝武後秦州事無預二左者故從便用魏年號記事

孝文太和元年春正月畧陽氏王元壽聚衆稱王二月秦州刺史尉洛侯擊破之

十七年秋九月秦州民王廣起兵應北地民支酉攻執刺史劉藻秦雍七州皆震

宣武帝正始三年春正月秦州屠各王法智聚衆二千推主簿呂苟兒爲主僭改元建明夏六月安西將軍擊王法智破之秋七月呂苟兒帥衆十餘萬屯孤



山圍逼秦州

孤山在上邽

元麗進擊大破之行秦州事李

韶襲孤山苟兒詣麗降

永光三年二月壬子秦州沙門劉光秀謀反州郡捕

斬之癸亥秦州隴西羌殺鎮將趙儁阻兵反叛州軍

討平之

孝明帝神龜元年春正月秦州羌反

正光二年冬十一月以秦州刺史河間王琛為行臺

以討反氏

五年夏六月秦州民薛珍等突入州門殺州刺史李

彥推莫折大提為帥大提自稱秦王遣雍州刺史元

志討之南秦州民張長命等攻殺刺史崔遊以城應

大提大提遣其黨卜胡襲高平克之殺鎮將赫連略

大提尋卒子念生自稱天子置百官僭改元天建秋

七月遣將討莫折念生念生遣其都督楊伯年樊元

張朗等攻仇鳩河池二戍東益州刺史魏子建遣將

擊破之八月遣都督元志討念生軍敗退守岐州為

賊所圍城陷志與岐州刺史裴芬之別將楊公熙皆

為賊擒送於上邽為念生所害九月遣齊王蕭寶寅



正統秦州新志 卷之五 二十七  
討念生

孝昌元年春正月念生屯黑水岐州刺史崔延伯擊破之追奔至小隴

二年秋九月天水民呂伯度始共念生同逆後與兄衆聚顯親以討念生戰敗降於梁胡琛琛以爲大都督秦王資以士馬擊念生屢破之乃復叛琛東引魏軍復據顯親念生窘迫乞降於蕭寶寅寶寅使行臺左丞崔士和據秦州大都督元修義停軍隴口久不進念生復反執士和送胡琛殺之久之伯度亦爲万俟醜奴所殺賊勢益盛寶寅不能制

三年秋九月秦州民杜粲殺念生自行州事冬十二月秦州刺史駱超殺杜粲

孝莊帝永安三年夏六月万俟醜奴反其行臺万俟道洛戰敗都督爾朱天光追之不及道洛遂走入隴歸畧陽賊帥王慶雲慶雲以道洛爲大將軍秋七月天光帥兵入隴右慶雲道洛出水洛城拒戰天光擒之乃頓軍略陽秦州刺史駱超走歸天光

因州民欲殺之也

孝武帝永熙二年秦州刺史侯莫陳悅害行臺賀拔



岳夏四月夏州刺史宇文泰引兵上隴討悅悅退保  
畧陽泰遣騎趣畧陽悅退保上邽召南秦州刺史李  
弼與拒泰弼陰遣使詣泰請內應悅棄州城南保山  
險弼諭所部趣上邽遂舉城降泰泰卽以弼爲秦州  
刺史泰入上邽衛將軍趙貴行秦州事泰隴定泰以  
李弼爲秦州刺史

西魏

文帝大統七年羌舍定入寇獨孤信時鎮隴右討破  
之

九年夏四月清水氏酋李鼠仁作亂隴右大都督獨  
孤信屢擊之不克丞相泰遣典籤趙昶諭之鼠仁降

隋

文帝開皇二年冬十二月突厥寇天水諸郡六畜咸  
盡

三年夏五月以河間王宏等爲元帥出塞擊敗之  
煬帝大業九年奴賊寇隴右盡掠牧馬遣元宏嗣擊  
之

十三年

恭帝義  
寧元年

春三月隴右盜起薛舉盡有隴西之



地聚衆至十三萬自稱西秦霸王夏六月自稱秦帝使其子仁越掠河池蕭瑀拒却之使仁果圍秦州克之遂自金城徙都秦州十二月丞相李淵使姜暮竇軌出散關安撫隴右漢陽諸郡相繼來降姜暮竇軌至長道爲舉所拒引還河池太守蕭瑀以郡降

唐

高祖武德元年夏六月秦主舉侵唐涇州秋七月唐秦王世民與秦主舉戰於高塘敗績八月薛舉卒子仁果立秦州總管竇軌擊薛仁果不利冬十一月秦王世民敗仁果降之以員外散騎常侍姜暮爲秦州刺史

五年秋八月突厥頡利寇邊命秦王世民出秦州道禦之

九年夏五月突厥寇秦州秋七月遣右衛大將軍柴紹破突厥於秦州斬特勒一人士卒四千餘級

武后萬歲通天元年契丹入寇詔許欽寂爲隴山軍討擊副使

聖歷元年突厥默啜剽隴右牧馬萬匹去



久視元年十二月突厥寇隴右

元宗開元二年秋八月吐蕃寇隴西詔隴右道發兵禦之

五年夏四月隴右節度使郭知運大破吐蕃於九曲

肅宗乾元元年吐蕃寇秦州

代宗寶應元年秋七月吐蕃入大震關陷岷秦成渭

等十州盡取河西隴右之地冬十一月鎮西節度使

馬璘擊吐蕃退居原渭之地

德宗建中四年春正月隴右節度使張鑑與吐蕃尚

統質盟於清水夏四月上命宰相尚書與吐蕃區頰

贊盟於豐邑里區頰贊以清水之盟疆場未定不果

盟

宣宗大中三年春二月鳳翔節度使崔珙破吐蕃克

清水秋七月鳳翔節度使李玘取秦州本紀稱吐蕃以秦原安樂

三州歸於有司又吐蕃傳言邠寧節度使張欽緒收秦州言各互異

懿宗咸通七年冬十月拓跋懷光擒悉熱其部衆奔

秦州尚延心邀擊破之

僖宗廣明元年黃巢陷京師僖宗幸蜀河東監軍陳



景思私還代州益募士三萬屯隴西

昭宗景福二年冬十月李茂貞盡有鳳翔與元洋隴

秦鳳十五州

天復二年秋七月孔勅取成隴州至秦州

三年夏四月西川節度使王建攻秦隴

後梁

晃乾化元年秋八月蜀城西縣號安遠軍岐王使劉

知俊擊蜀知俊與王宗侃戰於青泥嶺

在長舉縣蜀兵敗

績宗侃走保安遠軍

節西縣

九月蜀王命將救安遠軍

冬十一月援兵至安遠王宗侃出攻岐兵遁去岐節

度使李繼崇居劉知俊於秦州

繼宗時鎮秦州

瑱貞明元年秋八月蜀主遣制置使王宗儔等攻岐

取秦州岐秦州節度使李繼崇降蜀劉知俊亦奔蜀

四年夏六月蜀主命招討副使王全昱殺天雄節度

使唐文裔於秦州以王承休代之

後唐

莊宗同光三年秋九月伐蜀王承休自秦州赴援安

重霸留守冬十一月唐軍已破蜀重霸亦以秦成階



三州降

後晉

齊王開運元年春二月蜀人攻階州三月秦州兵救

階州敗蜀兵於西平

後漢

高祖乾佑元年春正月蜀宣徽使韓保貞要雄武節

度使何重建俱西保貞至秦州重建遂以秦成階三

州附於蜀攻下鳳州

後周

世宗顯德二年春二月詔王景與向訓趣秦州伐蜀

閏九月向訓克秦州

蜀雄武節度使韓繼勳先棄秦州遁歸判官趙玘舉城降時王

環為蜀守秦州攻之久不下後力屈乃降世宗嗟其忠

宋

太祖建隆三年六月蕃部尚波千等爭採造務以兵

犯渭北知秦州高防擊走之

開寶八年秦州大石小石族寇土門畧居民知州張

炳擊走之

太宗太平興國二年春三月秦州安家族寇長山巡



正統秦州新志 卷之五 三  
檢使常韜擊走之因命韜與馬知節田仁郎周承瑨  
王侁梁崇贊劉文裕屯兵清水秋七月曹瑋攻敗吐  
蕃築清水城及四砦

三年春三月秦州諸族數來寇畧三陽麻穰弓門等  
砦監軍巡檢使周承瑨任德明耿仁恩等會兵擊敗  
之又寇八狼砦巡檢劉崇讓擊敗之梟其帥王泥猪  
首夏四月秦州判官李若愚子雄飛矯制乘驛至清  
水縣縛都巡檢周承瑨及劉文裕馬知節等七人將  
叔守卒據城爲叛文裕覺其詐禽縛飛雄按之盡得  
其狀詔誅之及其父母妻子同產六月秦州清水監  
軍田仁朗擊破西羌斬獲甚衆

淳化元年秦州大小馬家族獻地內附

五年知秦州溫仲舒上言每歲伐木多爲蕃族攘奪  
今已驅其部落於渭北

真宗咸平六年六月隴山西首領禿通等貢馬願附  
大兵擊李繼遷

大中祥符三年趙德明攻秦州緣邊熟戶

九年三月以秦州曹瑋撫捍蕃境得宜詔嘉之秋八



月瑋大敗吐蕃斬首千餘級自是唃廝囉勢蹙退保  
磧中不出

天禧元年二月秦州神武軍破宗哥族馬波叱臘等  
於野吳谷多獲人馬十一月曹瑋平鬼留家族

仁宗皇祐五年七月秦鳳路總管劉煥等破蕃部斬  
二千餘級

嘉祐八年秋夏人出兵秦鳳抄熟戶擾邊塞弓箭戶  
殺掠人畜

神宗熙寧二年春二月夏人寇秦州陷劉溝堡殺守  
將范愿巡檢劉惟吉敗之

哲宗元祐二年秋七月夏人攻鎮戎軍諸堡劉昌祚  
等禦之而退

三年春三月夏人攻德靖砦諸將米贊郝普戰死詔  
劉昌祚以涇原萬人駐德順軍熙河五千人駐通遠  
軍據秦鳳要害以爲犄角夏人遂攻龕谷砦砦兵及  
東關堡巡檢戰死者幾百人

元符二年三月吳名革率部族孳畜歸順

徽宗崇寧四年正月秦鳳蕃落獻邦潘疊三州



高宗建炎二年正月金人陷秦州經畧李復降之四月隴右都護張嚴及金人戰於五里坡敗績死之五月曲端乘虜去復下秦州

三年張浚巡撫川陝辟劉子羽叅議軍事至秦州立幙府節度諸將

四年張浚兵敗於富平退保秦州劉子羽復以單騎至秦州召諸亡將悉來會先是曲端勸浚勿戰浚聽讒下端秦州獄至是端故將李彥琪等相繼降金犯秦州

紹興元年春正月金人犯秦州吳玠擊敗之復入鳳州郭浩與吳玠住援却之二月同州觀察副使劉惟輔棄德順軍輸欵於夏夏人不受夏六月張浚承制以吳玠爲諸路都統制又使劉子羽留河池調護諸將冬十月僞齊秦鳳經畧使郭振以數千騎掠白石鎮關師古王彥併兵大敗之獲振復秦州

二年吳玠以秦鳳經畧使戍河池春三月庚子金人攻方山原陝西統制楊政援之引去辛丑復犯隴安縣吳玠擊走之甲寅復自水洛城來攻楊政等又敗



之冬十二月金人侵熙秦關師古擊敗之

三年金人欲窺蜀先以李彥琪駐秦州綴吳玠河池之師春二月金帥撒离曷克饒風關入興元吳玠退屯仙人關秋九月吳勝克蓮花城

四年春二月庚寅金人犯兩當縣辛丑金人犯仙人關三月辛亥朔吳玠率楊政吳璘田晟王喜諸將與兀术戰於仙人關大敗之兀术遁去追至河池而還四月盡復鳳秦州八月吳玠遣統領姚仲攻隴城縣克之十一月吳玠遣統制楊從儀等率兵敗金人於

臘家城十二月吳倫遣兵攻臘家城破之

五年閏二月撒离曷欲犯秦州吳玠遣部將牛皓伺之遇於瓦吾谷戰死已復遣楊政擊敗之

七年正月吳璘奏西蕃三十八族首領趙繼忠等來歸用可扼西夏右臂

九年夏六月樓炤承制以吳璘爲秦鳳經畧使

十年夏五月金人陷同州宣撫胡世將居河池遣楊政由赤谷歸河池金人不敢度隴閏六月以吳璘爲鎮西節度使



十一年金人內侵宣撫使胡世將召郭浩吳璘楊政會仙人原使吳璘駐秦州郭浩出商州楊政出和尚原破之秋九月吳璘復秦州州將武誼降金將屯劉家園璘破之進次剡家灣以疊陣法更迭戰士殊死鬪金人大敗降者萬人胡蓋走保臘家城璘圍而攻之城垂破詔班師璘卽自臘家城還

臘家城在今秦安縣東十里

十二年秋八月鄭剛中分畫陝西地界割商秦之半畀金國存上津豐陽天水三縣及隴西成紀餘地棄和尚方山二原以大散關爲界

三十一年秋七月金張中彥王彥章據秦鳳窺巴蜀九月吳璘遣將劉海復秦州冬十月吳璘遣統制吳挺向起等及金人戰於德順軍之治平砦敗之金人攻秦州向起吳挺擊却之十一月癸未吳璘病自仙人原還興州戊子吳璘復力疾上仙人原

三十二年春二月興元都統制姚仲攻鞏州不下退守甘谷城遂引兵圍德順軍閏月姚仲攻德順軍敗金人於瓦亭砦新店三月戊申吳璘復德順軍甲寅吳璘自德順復還河池五月吳璘自河池如鳳翔巡



邊六月吳璘自大幽嶺檄召姚仲至軍前下河池獄命夔路安撫使李師顏代將其兵八月己丑吳璘與金人戰於德順軍甲申吳璘敗金人於北山十月金人攻德順城吳璘擊走之復遣兵追襲遂爲所敗十二月金人攻隴城縣官軍拒却之詔棄德順城徙兵民於秦州以裏屯住

孝宗隆興元年正月詔吳璘軍進退可從便宜璘已棄德順道爲金人所邀將士死者數萬計

二年冬十月金人遣使欲得商秦地十一月割商秦地歸於金

寧宗開禧二年韓侂胄欲用兵四月遣兵攻天水界入東柯谷爲金將劉鐸所敗秋七月吳曦遣楊雄李珪入秦州金完顏承裕破斬之冬十月金蒲察貞出成紀陷天水十一月金人攻湫池堡破天水吳曦在河池置不問十二月金人犯西和戰方急吳曦傳令退保黑谷軍遂潰乃焚河池退壁青野原

三年正月吳曦叛於河池引金兵入鳳州以階成和鳳四州付金表鐵山爲界三月安丙遣忠義統領張



羽復鳳州夏五月安丙遣李好義率步騎三萬攻秦州圍皂郊堡與金木虎高琪戰敗績

嘉定元年夏六月和議成金人來歸秦隴地

七年正月丁卯朔四川制置司遣提舉皂郊博馬務

何九齡率諸將及金人戰於秦州城下敗還

八年夏四月秦州人唐進與其徒何進等引衆十萬

來歸

九年秋九月金完顏益都攻皂郊堡

是年金宣宗貞祐四年四月金

陝西行省報秦州官軍破妖賊趙用劉高二之捷

十年十二月金完顏贊以步騎萬人犯四川戊辰迫

湫池堡己巳天水軍守臣黃炎孫遁金人攻白環堡

陷之

十一年春正月戊子金人圍皂郊堡壬辰利州將麻

仲率忠義人焚秦州永寧砦二月乙巳沔州都統王

大才馬蹶死於河池丙午金阿鄰入皂郊堡死者五

萬餘人三月王逸帥四川忠義人十萬復皂郊追金

阿鄰斬之併斬其統軍完顏贊進攻秦州至赤谷口

沔州都統劉昌祖命退師且放散忠義人軍遂大潰



金包長壽復攻皂郊四月遂趨西河陷之連陷成階州及河池河池守將楊九鼎亦焚城遁興元都統吳政敗之乃毀諸險隘而去

十二年正月庚辰金犯湫池堡守將石宣拒退之甲申金人攻白環堡守將董焯拒退之戊子金人犯成州沔州都統張威自西和州退守仙人原辛卯金人焚成州犯河池守將張斌遁去

十三年九月乙未宣撫安丙會夏人攻金命沔州都統張威出天水利州都統程信出長道己亥張威下令所部毋擅進兵庚戌金人犯皂郊堡沔州統制董焯等與戰大敗壬子程信及夏人攻鞏州不克信引兵趨秦州十月丁巳朔程信邀夏人共攻秦州夏人不從信遂自伏羌城引軍還

十五年秋七月蒙古木華黎令蒙不花引兵出秦隴伐金

理宗寶慶二年蒙古征西夏及秦州夏人盡撤橋梁軍不得前宣撫王楫夜督士卒運木石及曉橋成軍乃進



三年六月蒙古太祖次清水縣西江攻金陝西德順秦州清水等城其將趙按竺邇駐兵秦州

紹定四年蒙古拖雷分兵由山南入金境按竺邇爲先鋒趨散關宋人已燒絕棧道復由兩當縣出魚關入武休破興元遂侵仙人關八月制置趙彥呐委叅議高稼繕守仙人原北兵入彥呐登原督戰知天水軍曹友聞來救皆力戰却之十月北兵入鳳州畧河池友聞部分諸將却之北兵入沔州至大安又分軍自嘉陵江木皮口突出宋將何進敗死曹友聞遣白再興趣鷄冠隘蒙古攻陽平關不克還攻隘再興等力戰乃解

端平二年春蒙古太宗遣其子闊端等寇秦鞏冬十月闊端入成都招諭秦鞏等二十餘州皆降於蒙古三年九月曹友聞扼仙人關北兵衝大安制置使趙彥呐檄友聞援之友聞復遣其弟萬守鷄冠隘友聞親馳至隘下設伏會大雨戰敗與萬俱死之寶祐六年十月蒙古憲宗渡嘉陵江至白水江元



順帝至正十七年賊出自巴蜀陷秦隴

十八年四月張良弼據秦州

二十七年六月秦州守將蕭公達降於李思齊

明

太祖洪武二年夏四月徐達度隴清水知縣鐵木罕

巴北竄士民迎附克秦州元守將呂國公道都督陳

德追禽之秋七月各州縣俱歸附

三年大將軍徐達右丞梅思祖帥師自秦州又自徽

州南一百八渡至畧陽

四年春正月頴川侯傅友德等率步騎由秦隴伐夏

明昇五月滅夏夏文州守將丁世貞復集餘衆圍秦

州尋爲其下所殺

英宗正統九年秋套虜寇秦州秦安等處嘯騎東至

清水張家川其日五夜虜騎同肆掠及還我兵邀擊

之所掠多棄去

憲宗成化九年套寇深入直抵秦州

武宗正德七年蜀盜攻陷徽州城邑焚掠殆盡是時徽無

城郭又人不知兵故遭其慘分巡僉事李璋招撫散民并道屬衛卒始議修築



八年夏六月蜀盜復至徽州南鄙按察司僉事李璋帥三衛兵迎擊破之

嘉靖四年隴東流賊百餘流至秦安邑令張繼先督民兵戰於束隴谷執之

五年流賊百餘據秦州桃花山以叛指揮尹謨知州王卿討平之

十四年階州猓賊馬興犯徽州殺指揮王煦秋七月巡撫都御史黃臣駐節秦州遣叅將崔嵩韓選白浹指揮種繼討之遇賊於石門大敗之斬興於陣

二十一年秋九月北地流賊之大人遮掠清水縣境

嘉靖朝捕斬之

三十五年春二月清水縣人祁化以妖術惑衆

在隴上可欲遣兵抄沒一邑者知縣龐禮屢請寢兵

對賊自任誅化等爲首者十餘人餘黨解散邑人

新以全保

三十八年秋七月羅賊寇掠清水縣典史喬學中流

武備下

四



石洞山知縣季思率民兵擊之斬首二十餘  
賊走

四年十二月兩當民變殺知縣牛得用

元年十月漢南賊大梁王從兩當逼畧陽

五年賊紅軍友等從長寧驛西奔副將蔣一陽值賊

於清水縣矢亡數百人把總徐承斌陣歿都司李官

賊赴張家川總兵曹文詔遊擊曹變蛟追破

老

七年三月流賊奔隴右一斗穀老回回蝎子塊等寇

秦州登西關城適大雨如注民各奮勇敗之總督洪

承疇以是月二十二日至秦州調兵防守賊合兵入

兩當大肆焚掠復向漢中六月張應昌自清水追賊

敗績閏八月賊再聚臨鞏汧隴間承疇督兵搜勦復

由徽州入兩當殺署知縣車允賢典史李統焚公私

廬舍屠居民

八年二月流賊轉入秦鞏攻秦州東關城垂陷兵巡

道遣戍兵敗之過禮縣殺畧千計總兵孫顯祖敗別

賊於三陽川五月賊在汧隴官軍分路追擊賊大勢



復向秦安清水秦州間六月總兵張全昌副將賀人龍至清水之張家川斬賊百六十餘級

九年五月洪承疇遣總兵柳紹宗從徽州往畧陽勦李自成又遣兵往徽州拒之七月自成復犯徽州過兩當殺知縣王鼎鉉

十年四月賊小紅娘圍漢中洪承疇部勒賀人龍由兩當往救

十一年春蜀寇復由徽州以返秦三月洪承疇逐李自成前驅至禮縣覘知自成自洮州出蕃地遣總兵

曹變蛟追破之賊復入塞走西和禮縣

十三年冬十月囉賊馬流寇掠清水湯峪舖知府喬遷高追之圍於觀音殿燒殺之鄉民與其難

十四年流賊寇秦州西關賂州快守柴羔爲內應事洩會大雨貢生李芝率民兵逐之尋誅羔清水張家川民胡景鰲等聚衆數千人作亂知府喬遷高誘殺之攻其黨於任家堡賊衆悉平

十五年秋七月流賊一斗穀以萬餘人攻清水縣城三日不克去之



十六年冬十一月李自成遣賊帥袁宗弟劉體純取秦州本府通判朱廷璋署州事死之是月也征賊牛鎮守等敗反以數萬人攻清水縣城十五日不克去之

皇清

順治元年

即崇正十七年

正月闖賊餘孽武大定入秦州東

關指揮于光耀守備雷蛟率民兵驅出又賊帥高有功領兵數萬圍北城當夜賊衆見一人身高丈餘冕旒黃袍來往城頭次早于光耀發大砲殲賊數十人

賊敗去抵三陽川樊家城攻堡搶掠

二年夏四月肅王帥大兵征秦隴偽清水知縣丁圖昌迎降遣叅將王元安撫秦州

三年賊武大定盤踞仇池山肅王統京兵攻取駐秦州一載是年秋八月北地賊遮掠清水亭子舖知縣孫鏡率民兵攻之不克千總傅梅死之

又流寇黎馬賀王等陷徽縣城肆殺掠總督孟喬芳討平之

十四年冬十一月北地賊遮掠清水西二十里舖知



縣陳加論率民兵攻之不克千總李隆吉中流矢  
十五年秋七月北地賊遶掠清水西五里舖遊擊于  
邁引兵追之知縣姚之淵率民兵助之圍於地龍溝  
賊潰圍而出

康熙二年春二月北地賊楊老漢等遶掠清水白沙  
坡遊擊耿文裕引兵追之戰於弓門鎮敗績知縣孔  
述益率民兵追之戰於主山獲賊一點油等三人  
十三年五月吳三桂反雲南遣僞總兵郝龍陸道清  
據秦州冬十二月平涼提督王輔臣率總兵蔡元副

將白光勇等叛應之

十四年春正月白光勇陷清水縣城三月貝勒王帥  
大兵踰隴山討平之已至秦州貢生田碩等率衆降  
賊驚怖夜遁我揚威將軍阿振武將軍馮靖逆侯張  
勇勇畧將軍趙良棟奮威將軍王進寶等屯兵秦州  
秦民安堵如故



直隸秦州新志卷之五武備下終

直隸秦州新志卷之六

風俗 災祥附

風俗者奢儉貞淫之大凡無事可陳殆難爲志也故武功志無之然政教規模於是焉定民生休戚於是焉徵自郡大夫縣令鄉人士君子咸有導以善氣障彼頽波之責矧一州五邑爲地濶矣疆域攸分美惡互見詎可無志以示後哉五泉朝邑志著語最爲得體而所述元日接神五日送窮之類或他處多同且亦非美惡所係也可泉志秦州秦



安直採漢書以下統論天水隴西之語以盡其崖  
略是或一道也顧執古以概今與化移易之謂何  
抑又安得州邑齊一而略無殊耶今仍從舊例採  
諸史書併鞏昌舊志中語臚列於前而卽現前所  
見聞分別州邑稍爲論次於後庶使後來君子得  
考鏡焉志風俗第六若夫災祥事蹟舊志本別爲  
卷竊意亦風俗所由盛衰也輒強附之

天水隴西與關中同俗西有羌中之利畜牧爲天下  
饒然地亦窮險

史記

天水隴西山多林木民以板爲室屋皆迫近戎狄修  
習戰脩高上氣力以射獵爲先故秦詩曰在其板屋  
又曰王子興師修我甲兵與子偕行及車駟鐵小  
戎之篇皆言車馬田狩之事漢興六郡良家子選給  
羽林期門以材力爲官名將多出焉故此數郡民俗  
質朴不恥寇盜吳札觀樂爲之歌秦曰此之謂夏聲  
夫能夏則大大之至也其周之舊乎

漢書

天水於古六郡之地其人性直並有金方之氣然尚  
儉約習仁義勤於稼穡多畜牧無復寇盜矣

隋書



隴右道蓋雍州之境漢天水隴西等郡其各山秦嶺隴坻鳥鼠蟠冢其大川河渭

唐書

西接羌戎南抵蜀漢有銅鹽金鐵之產絲枲林木之饒其民慕農桑好稼穡被邊之地以鞍馬獵射為事

其人勁悍而質木

宋史舊志於此下載元史二語云俗於婚葬之儀多循古制今尋

考未得不

敢輒載

秦風車麟美秦仲駟鐵小戎皆慕襄公歷世雖遠軍旅久戍而婦人言念君子溫其如玉尚存古風

圖經

天水本隸秦在汧隴之西秦仲始大有車馬禮樂侍

御之好襄公始命為諸侯有田狩之事園囿之樂備

兵甲以討西戎西戎方強而征伐不休國人則矜其

車甲婦人能憫其君子

秦風小序

秦為雍州西境土厚水深其民端重質直無鄭衛驕

情浮靡之習以善導之則易以興起而篤於仁義以

猛驅之則其強毅果敢之資亦足以強兵力農而成

富強之業

朱子無衣詩傳

秦州山林藩屏原隰敷衍尚直習讓而勤於耕讀

清水東扼岍隴西限秦鞏以射獵為務

風俗



秦安四面阻山中洄一水明郵成習而薄華靡務農

禮左天水右岷山為秦保障務農織寡獄訟以上四則皆明

一統志而舊志述之當時秦州止領清水秦安禮縣也今莫覓一統志之書徽縣而當無從考列

人性質直俗尚儉約習禮義勤稼穡囚民安業舊稱

樂土舊徽州志

秦州為義皇關里其渾璞沕穆之初不可攷即秦漢

以來伊何貞信強毅也書稱其人性忠義先武勇耕

獵自養騎射相先重然諾負氣節比屋皆然故良家

之選獨為六郡雄代而降也氣節或變而為怯懦武

勇或易而為競爭雖耕讀如故而人情大異矣今喪

或用浮屠病或降神民沾沾自好而不讓獨其朴茂

質實勁直強毅古意猶存而其耗財費業佞神惑眾

俗之弊莫若賽孤魂秦邑胡中丞曰孤魂不知何神

而每歲春半闔郡之人家糾財釀貲兩關俱起孤魂

壇塗面裝神懸鬚代鬼翁翁攘攘一國若狂計其所

費不下十戶中人之產誘惑鄉民廢業群集首事及

終一月方罷每歲皆然不知所修何祀所舉何典傷

風敗俗無能止者郡中父老之責矣按秦州今已無賽孤魂之事而



備述之者以見敝俗  
不難於革今猶古也

徽州界隴蜀之間寒燠得中物產畧備又爲水陸通  
道商賈輻輳故四民樂業百務俱興舊稱樂土近自  
人情趨便旅不出途川漢之貨徑東出陽平抵鳳沔  
西出罨口過臨鞏白水江遂無篙工之迹加以比歲  
薦饑原野蕭條而民生日艱遂有佞奸犯科者父老  
感時則有風景頓殊之嘆矣

秦安縣路非要衝故商賈罕至史稱其人性勁直行  
真誠尚禮義習仁讓勤稼穡廣牧畜民勞而儉俗朴  
而淳賙卹成習而薄華靡雖小邑實樂土也惟是隴  
城蓮花之間苦爲盜藪而鷄川龍山一帶雖設有防  
守然責成弗重玩愒成習幾與之爲市矣

清水縣古秦亭地川原寥廓物產豐饒志稱其人尚  
力作急公賦喪厚棺衾不作佛事約會相賙婚姻不  
論財不計奩具隨家有無民無末作士重德行耕牧  
無擾村鎮多苦路雖衝衢民不知擾號稱樂土但山  
林險阻奸宄易藏梨樹張川裸人群聚積爲盜藪東  
劫關山西循藉水居民多罹攪擾商旅日爲畏途又



路徑多岐追捕不易有司者苦之自非設防宿兵阻山依險其漸不可長也

禮縣山川險阨幅幘褊小地僻民逸閭閻樂業以耕種畜牧爲生以節儉朴素自安宮室衣服車馬器用之類一敦樸素絕無雕鏤淫巧之習其婚喪之用與禮或合或離總不出淡簡質實又且口新通行旅輻輳生計日裕度幾乎醇龐之風已但接壤羌戎人性刁悍好爭健訟名著於時藏盜窩礦恬不知悔此爲惡俗當道者何以籌之

兩當縣以蕞爾小邑界在微山鳳水之間丹楫不通商賈不至故民不見奇袤之迹而無羨心不見異物而遷務農力本習儉安勤士敦實行民務常業喪葬嫁娶安儉習陋雖文物不足而質朴有餘事簡訟息糧無逋欠有古桃源風西南之善地矣惟是土踈善崩城垣弗固又故道之水浸蝕東郭屢築屢頽勞費無益承平亦自不妨萬一有事固入蜀之奇道也基石砌磚不可以陰雨未至而忽綢繆之計矣

鞏昌舊志六條

費廷珍曰踰隴而西土高風勁古謂涼州州處西南



隅地勢較卑風氣和暖穀蔬林木之饒甲他郡昇平  
百年益競文飾向所謂質朴者稍趨於浮矣蓋有家  
無儋石而婦女重錦以過市者嘉事或宴賓過費喪  
祭之儀以繁縟爲美觀而不應禮經此其敝也而婚  
不計財喪不用浮屠古意猶存本實未撥導之於善  
宜無難者秦安地益高田尤瘠其人疎於禮節輕脫  
無威儀衣食淡朴婚喪鮮侈費得寧儉寧戚之意豈  
淳風之未漓抑物力之所限與婚不論財如州而婚  
乃用樂喪且用浮屠是其敝也至於慷慨負氣士高

談而鮮勤民愚獷而輕訟尤其敝也清水地勢人風  
大畧如秦安而士習頗勤其於治生也亦勤躬耕之  
外間有從事市酤躬提壺以應客者雖云誠朴亦太  
甚矣民亦愚獷訟差少耳禮縣於五邑中號沃衍  
稱富庶威儀體貌郁郁如也顧浮飾頗甚飲食衣服  
宮室之用殆轉過於州士或以貲自雄卽恥爲布素  
務在奔走官府作形勢耀鄉閭而已民習於囂多喜  
訟亦乃過秦安欲使斲雕爲朴未易言矣徽縣故州  
也地又近南物產獨豐疑宜華而鮮實顧蜀道久塞



富商大賈之所不至因陋就簡猶秦安清水之亞乎  
 兩當僻萬山中尤朴鄙城無列肆何況於鄉聞外商  
 持布縷諸物叩門與鄉人市鄉人以粟易之商索粟  
 多寡無不如意輒大獲以去民至不識權度量為何  
 物斯尤可憫者也問閭細故更僕難終所知大畧如  
 此古云修習戰備射獵為先今亦未見其然至性直  
 有金方之氣則大概皆然第趨向殊異耳隨地施教  
 俾質文宜稱一道同風予愧未能也謹俟敷政優優  
 之君子

災祥

上古伏羲時龍馬負圖出於河在秦州三陽川

周

孝王十七年漢水冰

莊王二年秦武公二年渭水赤三日

襄王四年十二月星隕於秦有聲

考王六年六月秦雨雪

顯王八年彗星見於西方

赧王三十二年秦昭王二十四年渭水赤三日

直隸長州志 卷之二 風俗



漢

惠帝二年春正月隴西地震壓四百餘家夏大旱

高后二年春正月地震羌道羌道屬隴西郡今禮縣地

三年漢水溢流民四千餘家

文帝十五年春黃龍見於成紀

宣帝本始四年夏四月地震是歲郡國地震者四十九

地節元年春正月有星孛於西方

神爵元年秋大旱

元帝初元二年春二月戊午地震於隴西郡毀落太

上皇廟殿壁木飾壞官寺及民室屋壓殺人衆山崩

地裂水泉湧出

成帝建始元年有星孛於營室

鴻嘉三年五月乙亥天水冀南山大石鳴聲隆隆如

雷有頃止聞平襄二百四十里野鷄皆鳴

綏和二年春三月天水平襄燕生爵哺食至大俱飛

去

王莽末天水童謡曰出吳門望緹群見一蹇人言欲

上天令天可上地上安得民時隗囂初起兵於天水



後意稍廣欲為天子遂被滅

郭門名緹羣山名

東漢

和帝永元五年春二月戊午隴西地震

九年春三月庚辰隴西地震閏月羌犯塞殺畧吏民

安帝永初元年涼州大風拔樹是後西羌大亂涼州

十有餘年

二年夏四月甲寅漢陽阿陽

一作河陽城中火燒殺三千

五百七十四人

三年涼州大饑人相食

元初四年春三月朔去胃十二度隴西等郡各以狀

上史官不覺

延光四年春三月戊午朔日有蝕之在胃十二度隴

西等郡各以狀上

永寧元年至建光元年延光元年至四年郡國地皆

震

順帝永建三年春正月丙子漢陽地震陷裂屋壞殺

人地拆湧水出

永和三年春二月乙亥隴西地震山岸崩地陷

先是太史



令張衡造候風地動儀以精銅鑄成圓徑八尺合蓋隆起形似酒尊飾以篆文山龍鳥獸之形中有都柱傍行八道施開發機外有八龍各銜銅丸下有蟾蜍張口承之其牙機巧製俱隱在尊中覆蓋周密無際如有地動尊則振龍機發吐丸而蟾蜍銜之振聲激揚雖一龍發機而七首不動尋其方向乃知震之所在嘗一龍機發而地不覺動京師學者咸怪其無徵後數日驛至果地震隴西

建康元年春正月涼州都郡六地震從去年九月以來至四月凡百八十八日震山谷坼裂壞敗城寺傷害人物

桓帝延熹四年夏六月涼州地震

曹魏

廢帝芳正始元年冬十一月甲寅秦州雷電十二月

辛巳秦州地震

三年秋八月庚申秦州地震

六年秦州饑詔賑貸

晉

武帝泰始二年春正月辛丑白虎見天水西

六年五月秦州饑赦其境內殊死以下

咸寧四年白兔見天水

太康元年夏五月白鹿見天水



七年秋七月秦州隕霜殺稼

八年四月天水隕霜

九年夏四月天水隕霜傷宿麥

惠帝元康七年秋秦州隕霜殺稼大旱米斛萬錢疫

太安五年冬十二月秦州旱

懷帝永嘉四年夏五月秦州饑疫大蝗草木牛馬毛

鬣皆盡

東晉

元帝太興二年上邽大饑

三年夏五月己丑祁山地震山崩殺人

成帝咸和中上邽馬生牛又石勒時有秦州秦州送

白虎白鹿

孝武帝太元四年夏五月秦州大饑

七年冬十月秦州大熟

安帝義熙十二年姚泓據秦天水冀縣石鼓鳴聲聞

數百里野雉皆雉秦州地震者三十二殷殷有聲者

八山崩舍壞

次年泓遂滅

宋



文帝元嘉六年西秦地震草木皆自反

七年西秦自正月不雨至於九月

元魏

高祖承明元年六月秦州獻白鹿

太和元年春正月白鹿見秦州二月秦州獻白雉三月白雉見於秦州閏五月秦州地震殷殷有聲六月秦州饑

三年秋九月白鳥見秦州

四年冬十一月秦州獻白雉

五年春二月戊戌秦州地震夏六月上邽鎮城西於水中得玉車釧三二青一赤制狀甚精

六年夏五月癸未秦州地震至八月甲午復震有聲如雷乙未又震

七年春三月甲子秦州地震有聲

十年春閏正月丙午秦州地震二月丙子秦州地震有聲

世宗景明元年夏六月庚午秦州地震

三年春二月己丑秦州黃霧雨土覆地十月秦州南



稻新興二縣木連理各一

四年夏六月丁亥秦州地震秋九月秦州當亭四縣各木連理冬十二月辛巳秦州地震

正始元年十一月甲寅秦州雷電

三年秋八月庚申秦州地震

四年十一月秦州獻白雉

永平元年春正月庚寅秦州地震

延昌元年冬十月壬申秦州地震有聲

三年十一月秦州獻白雀

四年八月秦州獻白雀

肅宗熙平二年十二月乙巳秦州地震有聲

神龜元年秋九月秦州城西武陽山木連理

正光二年夏六月秦州地震有聲東北引

孝靜帝天平四年秋七月秦州井溢

後周

愍帝元年二月秦州獻木連理

明帝武成元年四月秦州獻白馬朱鬣

隋



文帝開皇二十年十一月秦隴地大震壓死千餘人  
仁壽二年隴西地震

唐

太宗貞觀元年隴右霜

八年秋七月隴右大蛇屢見

高宗調露元年十一月壬午秦州神亭治北露開如  
日初曜

中宗景龍二十二年春二月壬寅秦州地震

開元二十二年春二月秦州地震隱隱有聲拆而復

合經時不止壞廬舍殆盡壓死四千餘人

代宗大歷十三年六月隴右節度使朱泚於兵家得  
猶虎同乳以獻

德宗貞元元年夏蝗飛蔽天旬日不息所至草木葉  
及畜毛靡有子遺餓殍枕道民蒸蝗曝颺去翅足而  
食之

穆宗長慶元年二月隴土異獸如猴而腰尾皆長色  
青性迅猛捕蕃人而食遇漢人則否

五代



晉高祖天福七年四月關西諸郡皆蝗大饑死者十有七八

宋

太祖建隆三年秋七月己卯夜西方起蒼白雲長五丈貫天亘井宿

乾德二年夏六月秦州蝗秋七月秦州暴雨水溺民開寶元年關西大旱饑

太宗太平興國三年四月秦嶺南石洞自開得丹砂千二百粒獸形

四年八月秦州大水

雍熙四年成紀縣民王和敏牛生二犢

淳化元年夏六月秦州隴城清水二縣大雨壞官私廬舍殆盡溺死者百有三十七人

四年六月隴城縣大雨牛頭河漲二十丈没人廬舍真宗咸平二年春三月辛丑夜秦州三陽砦大雨崖摧壓死者六十二人

四年春正月秦州成紀縣山崩壓死六十餘人

景德元年冬十月戊申天雄軍有星出北方大如斗



隕於西北赤光丈餘

四年七月成紀縣崖圯壓死居民

大中祥符四年河池縣民馮守欽妻產三男

七年天水縣民王吉牛生二犢夏六月秦州定西砦

山川暴漲多溺死者

九年夏六月秦州獨谷水出壞長道縣鹽官鎮城橋

及官廨民舍二百九十五區溺死六十有七人

仁宗天聖五年春三月戊辰秦州地震秋七月辛丑

秦州鹽官鎮大水

神宗熙寧十年夏秦州大雨雹

哲宗元符元年兩當縣麥秀三穗

徽宗大觀元年秦鳳旱

三年秦鳳饑

宣和五年夏秦鳳路旱

南宋

孝宗淳熙十六年夏四月天水縣大雪傷人

寧宗嘉定二年夏六月辛酉長道縣水入城圯壘舍

金



宣宗興定二年二月秦陝狼害人元

成宗大德中關隴地震月餘不止

武宗至大元年六月丁酉隴西地大震

仁宗延祐二年夏五月乙丑秦州成紀縣山移是夜疾風雷電北山南移至藉河川次日再移平地突出土阜高者二三丈陷沒居民

四年秋七月己丑成紀縣山墮

五年春二月丁酉秦安縣山墮八月秦州成紀縣暴

雨山墮朽壤墳起覆沒畜產

七年冬十一月秦州成紀縣暴雨山墮壞廬舍沒畜產無數

英宗至治元年秋八月秦州成紀縣山墮

泰定帝泰定元年秋八月成紀縣大雨山墮水溢壅土至來谷河成邱阜冬十月成紀縣民趙氏婦一產三男

二年夏四月秦州饑六月秦州秦安縣山移成紀縣雨雹



文宗至順元年七月秦州各縣隕霜殺稼  
三年八月隴西等處地震

順帝元統元年秋八月壬申徽州山隕九月庚申秦  
州山隕冬十一月丙申成紀縣地裂山隕辛亥秦州  
地裂山隕

至元元年秋七月徽州雨雹民饑

二年夏五月壬申秦州山隕

六年夏六月己亥秦州成紀縣山隕地裂

至正三年春二月戊戌秦州成紀縣山隕水湧溺死

人無筭夏六月乙巳秦安縣南坡崩裂壓死人畜

十二年春三月秦州等處地震百餘日移山湮谷陷  
沒廬舍

明

太祖洪武二年秦州諸邑大旱饑

四年正月鞏昌等處地震

宣宗宣德三年隴右大旱饑

英宗正統三年秦州自夏逮秋大雨雹饑

憲宗成化八年八月漢水漲溢高數十丈城郭民舍



俱淹沒

十三年閏二月鞏昌諸處地震七月鞏昌諸州縣隕霜殺稼

十八年大饑人相食

二十一年至二十三年連年旱饑

孝宗宏治十七年秋隴右大饑

武宗正德元年六月徽州河溢湮沒居民孳畜

五年六月癸巳秦州山隕傷室廬禾稼甚衆龍王溝口山亦隕

六年七年饑

世宗嘉靖七年秦州各縣大旱人相食

八年飛蝗蔽天秦州清水秦安禮縣俱大饑人食草茹木秋七月秦安縣白日星隕於北郊

十九年夏五月一日魯谷水漲入秦州城西門衝折門閉

二十一年冬十一月秦州屬縣地震山崖崩墜塵飛蔽野

二十三年秋八月秦安鷄鳴山摧塞鷄川水經年隴



正嘉州新志  
卷之六  
十一  
水清旬日

二十四年秋八月癸丑秦安縣地震有聲

二十五年夏清水縣弓門鎮山裂深二百餘丈長亘山秋八月戊子秦安縣地震癸巳又震

二十七年二十八年連饑

三十四年冬十二月十八日隴右地震壞民屋舍

三十五年夏五月雨雹傷田

三十七年隴右地震十餘次

四十二年秦州屬縣饑

四十五年春正月清水縣右司房火秋八月地震

穆宗隆慶四年夏四月清水縣火燒民屋十餘家延及察院門坊

神宗萬曆六年秋七月大風死禾冬十月彗星見西方

八年夏六月雨至八月乃止清水縣湯峪山崩

九年夏五月清水縣糜穰川山崩秋八月旱至次年

七月乃雨

十年鞏昌等州縣俱大旱



十一年大饑人死枕藉夏四月漢水溢

十四年大旱十五年春大旱疫

十六年饑秋七月大風拔木禽死無算

十八年夏四月日中黑氣光不明者良久六月大雨

二旬

二十年冬十月二日丑時有星如月隕於西北

二十四年夏五月水雹傷田

二十五年春大風摧折樹木夏五月水雹傷田城中

或深二三尺

三十二年鞏昌諸處地一日十餘震

四十四年合省大旱

四十六年清水縣地震四十餘日

懷宗崇正四年鞏昌諸處地震壞廬舍損民畜

七年秋全省蝗大饑冬全省地大震壞屋傷人無數

九年十年連旱饑

十二年秦州關山中鼠化鶴鶉者以數千計

十三年州縣旱蝗太守喬遷高署巡道率官民捕之

禾苗得以無害



十四年大饑死者無算人相食秦州禮縣同日地震  
地裂水出

十五年四月初四日魯谷水衝中城後寨官泉漂溺  
人畜

皇清

順治六年兩當縣地震裂湧出黑水窑房崩塌壓死  
人民牲畜無數半月始平

七年兩當縣牛盡斃

九年秦隴大水六月初五日秦州魯谷水暴漲衝東

關漂溺人畜

時人謠言本月十三日十五日復衝至  
十三日果有暴雨入東關十五日有暴

水衝中城  
後寨諸處

十年八月禮縣地震

十一年夏六月地震年餘不止是月空中有聲如雷  
經時乃止秦州城垣官署民房崩圮殆盡壓死男婦  
萬餘口羅家堡七十峪兩山拽成一處壅河成潭禮  
縣木門地方山崩水壅壓漂居民村落水聚為海名  
曰海子近復變為桑田

十二年夏四月初四日秦州屬縣大雪次日降黑霜



菓木萎死

十四年冬十一月十二日夜有赤星如斗隕于西北  
空中有聲如雷

康熙元年夏五月秦州諸屬大雨至冬十月方止夏  
秋禾皆傷兩當迅雷七日暴雨崩山

二年饑夏六月冰雹傷夏禾幾盡

六年兩當縣雹如兔大積滿山谷

八年徽州夏麥雙穗

十年冬十一月清水縣有星晝隕於西北空中有聲

十一年徽州地震

十二年禮縣雨雹傷禾隴右道陳臺蓀詣縣設賑

十三年彗星見西方

十四年清水冰雹傷夏禾秋大雨月餘

十五年清水冰雹傷秋禾

十六年六月秦州南湖開竝蒂蓮數枝禮縣黑峪里  
麥秀三岐

十七年夏四月有星孛於西方六月禮縣黑峪里土  
城獲麥秀有三岐者數本



二十年六月秦州水月寺池開竝頭蓮仙鶴至清水縣蟲食豆盡

二十一年秦州關帝廟生五色靈芝

二十二年清水縣蟲食豆

二十三年夏旱三月秋雨二月冬渭水清

二十四年夏旱二月秋雨月餘

三十一年兩當縣旱疫死者無算

四十二年秦州老民李剛年一百四歲

四十八年秦州老槐樹生蓮二朶

五十七年五月二十一日秦州諸處地大震數十日

不止山崩地裂壓傷人畜秦安最甚

六十年秦州諸處大饑

雍正二年秦州民丁守會年一百一歲五年秋八月

初二日水雹漫天經日不散震死牛羊雀鳥無數秋

禾塗炭

十三年禮縣水災

乾隆四年白鶴棲於秦州伏羲廟栢秦安城北山崩

隴水壅不流者數日



正統秦州新志 卷之六  
十五年夏五月二十五日夜秦州魯谷水漲淹漂兩岸  
房肆人死者百餘是歲也自閏六月雨至於九月秋  
禾不實

六年隴右諸郡俱大饑

十年秋七月隴右大水秦州汝河水漲淹沒田園

十一年三月禮縣間井堦城雨雹傷禾及牲

十三年七月禮縣賈家里因大雨水冲坊市及人畜

十六年秋八月秦州紅旗山隕

二十一年秦州北鄉熊旗寨山隕先數日山鳴有聲

居人多避之故免於難

二十四年隴右諸郡大旱饑

二十七年白鶴見於秦州又三陽川峪口神廟中於

十二月有鶴來集次年正月中乃去

二十九年正月清水縣民喬國祥妻王氏一產三男

直隸秦州新志卷之六終



二  
一  
三  
五  
六  
七  
八

九  
十  
十一  
十二

十三







